

Visoki predstavnik apelira da se hitno donese Zakon o deminiranju na državnom nivou

Visoki predstavnik, Wolfgang Petritsch, očekuje da državni Zakon o deminiranju bude stavljen u drugom čitanju na dnevni red sljedeće sjednice Zastupničkog doma BiH, koja je planirana za 12. februar, kao i da nakon toga bude hitno usvojen.

U Bosni i Hercegovini je od 1995.god. poginulo oko pet stotina osoba a trostruko veći broj osoba je povrijeđen u nesrećama koje su prouzrokovale mine. Visoki predstavnik je odlučan u svom stavu da politički interesi moraju biti manje važni od donošenja hitnog i sistematskog programa uklanjanja mina. Ne smije doći do daljnjih zastoja po ovom pitanju; ovo pitanje se ne može koristiti za političke igre. Mine predstavljaju najopasnije nasljeđe rata. Mine još uvijek ubijaju i osakaćuju ljude.

Predloženi državni zakon će po prvi put postaviti deminiranje u BiH u formalni zakonski okvir, stvarajući potrebnu strukturu za sprovođenje, vođenje i kontroliranje aktivnosti deminiranja u BiH pod nadležnošću Komisije za deminiranje pri Ministarstvu za civilne poslove i komunikacije i Centra za uklanjanje mina BiH (BiH Mine Action Centre). Ovim zakonom će se ojačati Komisija za deminiranje, stvarajući jedan centar koji će predstavljati operacije deminiranja u BiH u svojim odnosima sa Međunarodnom zajednicom. Ovaj Zakon će dati ovlaštenja Centru za uklanjanje mina BiH da primjenjuje iste standarde deminiranja na cijelom teritoriju BiH, i po prvi put će ponuditi zaštitu deminerima tako što će definirati njihove odgovornosti i prava u skladu sa međunarodnim standardima. Nadalje, ovaj Zakon će smanjiti neproporcionalno velik broj ljudi u upravnoj strukturi što je pravilo probleme radu na deminiranju u BiH.

Međunarodni donatori, koji su do sada davali pomoć za deminiranje u BiH, žele dokaz da BiH ovom problemu pristupa na ozbiljan način. Donatori su zatražili da se veća pažnja posveti pitanju deminiranja na najvišim nivoima BiH vlasti, da entitetski budžeti i državni budžet započnu sa finansiranjem uposlenih u Centru za uklanjanje mina u 2002.god., da se donese program deminiranja za cijelu državu, kao i državni Zakon o deminiranju. Rok za sve ove aktivnosti je početak marta ove godine, kada će se Donatorski odbor za deminiranje sastati da potvrdi finansijska sredstva za aktivnosti deminiranja u budućnosti. Donatori su jasno naznačili da se neće moći računati na veliku pomoć ukoliko se ovi zahtjevi ne ispoštuju.

Od suštinskog je značaja za sve aspekte života građana da se BiH očisti od mina. Povratak, ekonomski razvoj kao i investicije u velikoj mjeri ovise o vještima timovima koji uklanjaju ovu smrtonosnu opasnost. Visoki predstavnik je odlučan u tome da neće dozvoliti da donošenje ovog zakona bude ugroženo proceduralnim odugovlačenjima, što je postalo standardna taktika srpskih predstavnika u institucijama državnog nivoa. Dobrobit vještih i hrabrih deminera zavisi od ovog zakona. Kao što su tragični događaji pokazali u zadnjih nekoliko dana, i životi djece isto tako ovise o ovom zakonu.